

tutte le novize de Venesia quando le se sposavano erano sposate nella giesia de S. Piero de Castello per el Vescovo nel xorno de M.^o S. Marco, che vien a dì 31 de Zener, le qual portavano con esse in dita giesia le soe dote & impromesse. Et nel tempo ch'era Doxe M.^o Piero Candian, che ora sono Sanudi; che fo nel 943, Triestini che erano inimixi de Viniziani, & sapevano tal usanza, armò una galia e un brigantin, e vene la vizilia del detto S. Marco che fo a dì 30 Zener, & la note ascoxeno nel Vescovado de S. Piero de Castello, & la matina seguente, che fo el dì de S. Marco, essendo le novize in giesia per far le sponsalixie con tutte le dote & impromesse, essi Triestini insino fuora, & trovati i Venetiani sprovvisti ne tajò molte a pezzi, e tolseno le novize con tutte le soe dote & suo haver, & menole suxo la soa galia, & andono sopra li tre porti, e comenzono a partir quello che havevano derobato e tolto.

Et essendo questo spanto per la terra, tutti corsero a Castello, & dito Doxe fece armar barche assai presto da Chioza e Malamocco, e personalmente lui andò con dite barche, & i Casseleri de la contrà de S. Maria Formosa se misseno in ponto e ben in ordene facendo pavexi de le tavole che lor feva le casse, e tutti andono adosso la galia, & quella involsino; e fono essi casseleri che fono i primi che montasseno sopra essa galia, & fono morti assai de tutte doi le parte, & tajono a pezzi tutti li Triestini, non ne facendo alcuno de loro prexon. Et questo volse el Doxe acciò i non avesse sepoltura li corpi soi in terra, ma che el mar fosse il suo molimento per la luxuria grande & offesa che feceno a Vini-

ni-